

Martxoaren 7an GARIZUMAKO 3. IGANDEA

Agurra

Bihotz-berritzera dei egiten digun Jesu Kristoren grazia eta maitasuna zuekin.

Sarrerako oharpena

Aurrera goaz Garizumako ibilbidean. Munduko gurutziltzatuak ezin ditugu ahaztu bide honetan. Gizarteak ere behar du bihotz berria, arnas berria. Badugu elkarte bezala erantzukizuna horren aurrean.

Ospatzen dugun Eukaristiak laguntzen digu Kristorekin bat eginik Jainkoarentzat egiazko tenplu bizi eta senideentzat zerbitzari leial izaten.

Damu-otoitza

Ospakizun hau hastean, eska diezaiogun Jainkoari eman diezagula egiaz bihotz-berritzea; era honetan, adiskideturik, Jainkoarekiko eta senideekiko gure batasuna sendotuko zaigu.

- Jesus Jauna, gizadiaren salbamena gurutze-habeen **ezarri** zenuena: erruki, Jauna.
- Jesus Jauna, guk zure urratsei jarraitzeko, / gugatik nekaldia **jasan** zenuena: Kristo, erruki.
- Jesus Jauna, gu, bekaturako hilik, santutasunerako bizi gaitezen / gure bekatuak zeure bizkarrean habe gainera eram**an** zenituen: Erruki, Jauna.

Erruki dakigula Jainko guztiz ahaltsua, eta, gure bekatuak barkaturik, eraman gaitzala betiko bizira.

Otoitza

**Jainko errukitsua, on guztien iturria,
baraua, otoitza eta erruki-egintzak
ipini dizkiguzu geure bekatuen sendabide;
begira bihotz onez geure ahuleria aitortzen dugunoi
eta bizkor gaitzazu zeure erruki handiaz
bekatuaren zamapean aurkitzen garenok.
Zure Seme Jesu Kristo gure Jaunaren bitartez,
Zurekin eta Espiritu Santuarekin batean
Jainko eta errege bizi baita gizaldi eta gizaldietan.**

Hitzaren liturgiari oharpena

Salbamenaren historian Jainkoa gizakiengana hurbiltzen da eta askatasuna eta maitasuna eskaintzen dio bere herriari. Baiezko eta ezezko, leialtasun eta purrusta... horra gizakiaren hainbeste erantzun kontrajarriak. Jesu Kristorekin egiaz topo egiteak indartzen eta sendotzen gaitu gure fede bidean.

Lehenengo irakurgai (*Ir 20, 1-17*) *Edota laburrago, kakotx artekoa utzita.*

Irteera liburutik

Egun haietan, Jaunak hitz hauek esan zituen: «Ni naiz Jauna, zure Jainkoa, Egiptoko lurraldetik, eskabotatik atera zintuena. Ez izan Ni beste jainkorik.

[Ez egin idolorik, ez irudirik, goiko zeruan, beheko lurrean edota lurpeko uretan direnetatik. Ez ahuspeztu horien aurrean, ez eman gurtzarik ere. Ni, Jauna zure Jainkoa, Jainko jeloskorra bainaiz: gorroto didaten gurasoen gaiztakeria ondorengoengan zigortzen dut, hirugarren eta laugarren gizaldiraino; baina milagarren

gizaldiraino agertzen diet errukia Ni maite nautenei eta nire aginduak gordetzen dituztenei.]

Ez erabili alferrik Jaunaren, zeure Jainkoaren, izena, Jaunak ez baitu zigorrik gabe utziko haren izena alferrik erabiltzen duenik.

Izan gogoan larunbat eguna, Jaunari sagaratzeko. [Sei egunez egingo duzu lan eta zeure eginkizun guztiak burutuko. Baina zazpigarren eguna atsedeen-eguna duzu, Jaunari, zeure Jainkoari, eskainia. Egun horretan ez duzu batere lanik egingo, ez zuk, ez zure semeak, ez zure alabak, ez zure morroiak, ez zure neskameak, ez zure abereak, ezta zure herrian bizi den etorkinak ere. Zeren Jaunak sei egunean egin baitzituen zeru-lurrak, itsasoa eta horietan dagoen guztia, eta zazpigarrenean atsedeen hartu baitzuen. Horregatik, bedeinkatu egin zuen Jaunak larunbata eta egun sakratutzat ezarri.]

Aintzat hartu aita-amak luzaro bizi zaitezten Jaunak zeure Jainkoak emango dizun lurraldean. Ez hil inor. Ez egin aduleriorik. Ez ostu. Ez egin gezurrezko testigantzarik lagun hurkoaren kontra.

Ez irrikatu lagun hurkoaren etxerik, ez haren emazterik, ez morroirik, ez neskamerik, ez idirik, ez astorik, ezta beste ezertxo ere».

Erantzun-salmoa (Sal 19 [18], 8-9. 10-11)



Bai mai - te du - da - la, Jau - na, zu - re le - ge - a.



Jaunaren legea bikain, barrena arnasber**ritzen** du;
 Jaunaren manamendua fidagarri, heldugabea zuhur eg**iten** du.
 Jaunaren arauak zuzen, bihotzaren **poz**garri,
 Jaunaren aginduak distiratsu, begien arg**garri**. R/.

Jaunaren begirunea garbi, iraunkor **beti**ko,
 Jaunaren erabakiak egiazko, den-denak **bide**zko.
 Urrea baino, urre araztua baino desiragar**ri**ago,
 ezti, ezti berria baino go**zo**ago. R/.

Bigarren irakurgaia (1 Ko 1, 22-25)

San Paulo Apostoluak Korintoarrei egindako lehen gutunetik

Senideok: Juduak ezaugarri eske dabiltza eta jentilak jakinduria bila;; greziarrak, jakinduria bila; guk, berriz, Jesu Kristo gurutziltzatua predikatzen dugu, judutarrentzat onartezina eta jentilentzat zorakeria dena; baina deituentzat, judu izan ala ez, Kristo hori Jainkoaren indarra eta Jainkoaren jakinduria da. Zeren Jainkoaren zorakeria omen dena gizakiak baino jakintsuago baita, eta Jainkoaren ahuleria gizakiak baino indartsuago.

Ebanjelio-aurreko gorapena (Ik. Jn 3, 16)



Je - su-kris- to gu - ri min - tza, ar - gi gu-re bi-ho - tza



Hain maite izan zuen Jainkoak **mun**dua,
 bere Seme bakarra **eman** baitzion;
 harengan sinesten duenak betiko bi**zi**a du. R/.

Ebanjelioa (*Jn 2, 13-25*)

Homiliarako argibideak

Hamar aginduak

Garizumako hirugarren igandeko Ebanjelioaren gaia tenplua da.

Jesusek tenplu zaharra garbitzen du, harizko zigorrez saltzaileak eta merkatariak kanporatuz; orduan, bere burua aurkezten du, gizakiek suntsitu eta Jainkoak hiru egunetan berregingo duen tenplu berria bezala.

Baina oraingoan lehenengo irakurgaiari begiratuko diogu: dekalogoia, Jainkoaren hamar aginduak. Gizaki modernoak ez ditu aginduak ulertzen; Jainkoaren debeku arbitrariotzat hartzen ditu, bere askatasunari ezarritako muga bezala. Baina Jainkoaren aginduak bere maitasunaren eta aitak gizakiak egindako eskaeraren adierazgarri dira. «Zaindu zoriontsu egingo zaituena» (*Dt 6, 3; 30, 15* eta hur.): hau da, eta beste bat, aginduen helburua.

Gaur egun Sinai gailurrera doan bidexkaren zenbait pasabide arriskutsutan, erromes edo mendizaleak eror ez daitezen arrisku seinaleak eta hesiak jarrita daude. Aginduen helburua antzekoa da. Aginduak euskarri edo heldulekuak dira. Gauza jakina da zer gertatzen den uholdeetan edota elurteetan, mugak gainditzen direnean. Guk geuk ikusten dugu zer gertatzen den gizartean zenbait agindu sistematikoki zapaltzen direnean, hala nola ez hiltzea edo ez lapurtzea...

Jesusek agindu guztiak, are gehiago, Biblia osoa, agindu bakar batean, Jainkoarenganako eta hurkoarenganako maitasunean biltzen dira. «Bi agindu horietan dute oinarri lege osoak eta Profetek» (*Mt 22, 40*). San Agustinek arrazoi zuen «Maitatu eta egizu nahi duzuna» esatean. Izan ere, benetan maite baduzu,

egiten duzun guztia onerako izango da. Zuzentzeko errieta egitean ere, maitasunagatik izango da, beste baten onagatik.

Baina hamar aginduak batera hartu behar dira; ezin dira bost onartu eta beste bostak baztertu, edo aukeraketa egin. Gure bizitza aztertu beharko genuke zer egiten dugun ikusteko, hau da, manamendu batzuk zehatz-mehatz behatzen baditugu eta beste batzuk alaitasunez urratzen baditugu, ez dugu maitasunez Jaunaren legea betetzen.

Arreta piztu nahi nuke, bereziki, zenbait girotan sarrien urratzen den agindu bati buruz: «Ez duzu Jainkoaren izena alferrik hartuko». «Alferrik» hitzak errespeturik gabe edo okerrago esan nahi du, mespretxuz, haserrez, biraoka. Hainbat tokitan, biraoa erabiltzen dute etengabe hizketaldietan tartekaturik, entzuten dutenen sentimenduak kontuan hartu gabe. Saiatu behar genuke, gure hizkera ere zuzentzen: Jainkoarekiko maitasunean haziko ginakete, eta entzulearekiko begirunean eta maitasunean ere bai.

Eukaristian berri dezagun, gugatik hil eta hirugarren egunean piztua izan zen Jaunaren misterioa eta Jesusekiko eta Elizarekiko begirunean hazi behar dugun bezala, gu geu ere Jainkoaren tenplu garenez, zaindu dezagun gure burua.

Jainkoaren herriaren otoitza

Basamortuan otoitzari emana bizi izan zen Jesus gure Jaunaren ereduari jarraituz, egiogun otoitz guk ere aspergabe Jainkoari:

Erantzuna: **Kyrie, eleison!**

Ky-ri-e, Ky-ri-e, e - lei-son! Ky-ri-e, Ky - ri - e, e - lei - son!

- Fededun guztiak, Garizumako penitentzi eta ekinaldien bidez, beren erruetatik garbituak eta kristau bizitzan sendotuak izan daitezten. Egigun otoitz. R/.
- Herri guztiek iris dezaten beharrezko bakea baretasuna eta ongizatea, era horretan zeruko ondasunak errazago bila ditzaten. Egigun otoitz. R/.
- Jaunak, tentatuak edo minduak direnei indarra, bekatariei bihotz-berritzeko gogoia eta triste eta atsekabetuta daudenei barne-poza eman diezazkien. Egigun otoitz. R/.
- Jaunak bihotz-berritzeko egiazko gogoia gudan sorraraz dezan, pazko-sakramentuak ospatzeko behar bezala presta gaitezen. Egigun otoitz. R/.

Zuzen itzazu, Jainko Jauna, gure bihotzak Zure esanetara eta egizu gurutzearen jakindurian barnera gaitezela, lotzen gaituen geurekoikeriatik askaturik Espiritu Santuaren dohainak iritsi ditzagun eta Zu gurtua izango zaren tenplu bizi bilaka gaitezen. Jesu Kristo gure Jaunaren bitartez.

Prefazioa

Garizumako I. edota II. prefazioak erabil daitezke (Meza liburua 478-480 orr.).

Jaunartze-ondorengo otoitza

**Betiko salbamenaren agiria da, Jauna,
 lur honetan jadanik,
 hartu dugun zerutar ogia;
 egizu, orain sakramentuz ospatu duguna
 egintzetan bete dezagula.
 Jesu Kristo gure Jaunaren bitartez.**

Herriaren gaineko otoitza eta bedeinkapena

Jauna zuekin. R/. Eta zure espirituarekin.

Makur zaitetze, Jaunaren bedeinkapena hartzeko.

(Eskuak herriaren gain zabalik bedeinkapena esango du:)

**Gida ezazu, Jauna, zeure fededunon bihotza
eta eman errukitsu zeure zerbitzarioi grazia hau:
Zuganako eta lagun hurkoaganako maitasunean iraunez,
zure aginduak oso-osorik betetzea.**

Jesu Kristo gure Jaunaren bitartez. R/. Amen.

Bedeinka zaitzate! Jainko ahalguztidunak:

Aitak, eta Semeak, + eta Espiritu Santuak. R/. Amen.

Zoazte Jaunaren bakean. R/. Eskerrak Jainkoari.

Herriaren gaineko otoitzaren ordeztan, erabil daitezke Bedeinkapen Nagusia (Ikus Liburuxka honetan 4. or.).